

新刊國朝二百家名賢文粹

新刊國朝二百家名賢文粹卷第六十五

策

時議策九

裕蜀

荆勝先生

論天下形勢必資之秦論秦雍軍須必資之蜀秦與蜀壤界之國也擁四川之饒據五路之強而中興之大勢定矣抑惟陛下至明旁燭而用之以晦大德不冒而用之以恭於是結二國之信致諸宗祧敷上帝之福錫之天下綏靖河洛澄一滄渭天下胃腹也今已據其胃腹則號令之施足以掩天下矣光復大業紹開中興千載一時也巨竊謂蜀宿重兵歲月淹久一歲供億士慮千方緡玉壘豐腴燠於轉輸西海羽毛燼於器甲而蜀入之力日以殫矣仰賴陛下惻怛最興念慮遠方慨蜀漢宿兵之久憐民氓飛餉之勞乃詔樞臣徙兵關右全蜀父兄亟蒙福祉自謂可以少燕一日之閒矣然巨竊念之其弊猶在者官冗是

也水濁則魚困官冗則民乱事要則易從法簡則易行且蜀之  
力何以困於羣之也非特於羣之冗官病之也蓋自軍興以來  
於是有所制置司之官於是有所都漕司之官於是有所州縣酒官及  
催撥運米官之流煩擾乎供須崇侈乎饋問公私焦然物力耗  
竭困饑空寡老弱罷病而蜀之人益以瘠矣伏願陛下伸之以  
訓辭裁之以紀極省官併局則益利卒不急之負薄賦緩征則  
灌漑有息肩之日如是則蜀日以肥可以餉秦秦日以勁可以  
蹙蜀中興之業永為万世無疆之休

恢復

同前

嘗攷荆楚之區北臨漢沔南薄交廣東界吳會西瀕巴蜀諸葛  
孔明以為用武之國者是也外帶江漢內據巖阻魯肅以為金  
城之固者是也孫權都武昌黃龍之元徙都建鄴以陸遜輔其  
子鎮焉豈非以其地形得止流之勢攷荊州之險足以為國之  
隱蔽故耶又使步騭守沔陵程普守江夏呂蒙守陸口朱然守

南郡而魯肅甘寧之徒亦復經營於資水益陽之間是數公者  
皆天下魁傑奇偉豪爽萬人之英而權悉付之以上流之任其  
意蓋以為先據夏口則上流之形勢可全又據楚關則南夏之  
勢益廣矣孫權雖威行江東據有八江騁技賈力不足以駕三  
方之雄而劉備曹公天下強對也陸遜亦劉備對周瑜非曹公  
對卒能窘劉備於西陵蹙曹公於赤壁破壞摧辱退步千里夫  
豈有異故哉誠以楚關為城長江為池而得上流之便故也仲  
惟陛下受命巾輿恢復疆宇大縣數百名城十二自河而南悉  
王悉臣光復舊業系隆我宋世之議者棘欲蹙孔明跨有荆益  
之言謂杜甫江陵望幸之句以謂中原父老虛心注目願望陛  
下朝服濟江駐蹕諸宮巨擘則謂其說是矣而時則不可也且  
自岷江峯小舟漾蔓峽泛荆渚浮夏口倚薄九原廬阜督草郡  
守例兼田官已而徜徉四顧迥眺千里獸蹄鳥足寂無人迹正  
念戈兵斷刈歲月汚久穢人獸傷生曠肆玩則地何由闢糧何

由積將何以奉萬乘供百官哉取諸岷益則岷益鮮耗而無窮  
賜諸鄢郢則鄢郢養求之未給伏願陛下少復侯之加以數年  
地益漕益糧益得誠然後振施以臨三楚清蹕而朝諸侯可也  
更復侯之歷歲滋久河潼囂庶許洛昌大然後復皇輿於舊京  
旋占鼎於天邑可也臣書生驚弱僭論國事輕觸宸嚴惟陛下  
赦其愚尚熟一計之

和好

同前

古之人君恢然有帝王之度而其明哲英睿足以權天下強弱  
利害之勢者西京之文帝東京之光武是也臣嘗讀兩漢書有  
以少識文帝光武之用心留於用兵而厚於惜天下之力所以為  
後世計至深遠也漢遺單于書以尺一牘單于乃以尺二牘尺三  
封皆同廣長大倨傲其辭曰天地所生日月所置匈奴大單于文  
帝乃復夷然安之不異也未嘗復加大名而勝之也光武  
用兵機速若神然天覆北胡極容隱納肯中曠然而外之於

寒露不毛之地臧宮馬武誦言而欲誅之帝惜其言弗用也由是觀之是二聖人者其真有帝王之度哉逮我巨宋道德寬大淵然有帝王之度者仁宗皇帝是也慶曆中富弼以知制誥資政殿學士尚書戶部侍郎使契丹劉六符管之既謂虜主退請崇修弼乃委曲曉之虜謀遂折增歲賂二十萬弼還復命仁宗寵嘉之以爲樞密副使王拱辰之讒弼也敗之曰弼弟能辨中國以奉夷狄耳胡功之爲仁祖委其語待弼滋厚遂外右府已而相之臣切考漢家故事供給南單于費直歲一億九十餘萬西域歲七千四百八十萬永初中羗有桀心剽亂西鄙十有四年靡二百四十萬億永和之末復經七年八十余億段紀明之平東羗也凡百八十戰而費四十四億由是論之王拱辰以增賂爲出國之弊是蓋不知自漢以來屯戍轉輸歲與虜角者其費可勝支哉夫克齊子胥懼晉侯敗楚子癸弔趙子亮楚侯聞諸侯悼公和戎威伯中夏然則天下利害強弱之勢不即其

隱密之所而逆制之姑幸於一勝而忘其敗姑恃其細娛而忽其大憂此固有天下之至禁也臣又嘗攷唐之中葉方鎮猖然徂恩恃功侮慢不忌唐之謀臣引兵而戰魏博折鎮襄陽黃青然皆暫馴而復擾陽假而陰搆困而不支唐日以微世之論者乃冒其源肇於天寶乾元之初其流漫於大曆正元之后自臣觀之太宗所以爲後世計者過也左舉則頡利亡右舉則高昌亡中舉則突合渾薛延陀之衆亡唐之威武亦能振於天下矣迺復悉卒并軍而身搏之於遼水之上夫太宗侈於用兵而厚於費天下之力其毒延於代宗德宗之世日鬪天下之士而唐之謀臣不知所以解之也方鎮之士復專兵一方共起而危唐而亡之謀臣不知所以禁之也唐自開天下之士以弊方鎮方鎮鬪河北之士以弊唐而唐日以微也臣故曰唐太宗所以爲後世之計者過也故曰天生五材而用之力盡而弊之不可復振此有天下之至禁也臣切伏覩陛下講好結信以交兩國之

歡疲兵休士以重萬民之命省征伐之用肥仁義之訓紘繫方國以承天休然則陛下之神謀昭昭固知兵力之不可盡而思有以蓄之也固知天下之力不可費而思有以息之也固知後世生事邀功之臣開邊以羸中國而思有以戒之也然臣區區之愚尚有謁焉宋國不競楚國請交羊祜務德吳人胥悅二境交和國家賴之伏願陛下飭邊吏各守分界無隱茲無專利無邀功以仰副陛下穆鄰好紓吾民之嘉惠永爲萬世不窮之休

### 御將

臣聞天下之勢莫重於制兵人主之權莫大於御將近者諸將之兵皆總於朝廷以隆內重之威以銷未萌之患其於制兵可謂得天下之勢矣至於御將之權陛下英睿天縱必有深術非臣愚闇所能測識然區區之忠苟有所懷不敢不盡臣觀自古撥亂反正之君皆善於御將而任使之故能有成功而無後憂臣不敢遠引以煩聖聽獨以本朝太祖皇帝之事告於陛下臣



聞太祖之御將也結之以恩豐之以財小其名而重其權少其兵而久其任諸將守邊每來朝必命之坐賜子優厚撫而遣之所謂結之以恩者如此西北邊軍市之租分賜諸將不可坐入所謂豐之以財者如此郭進李漢超之徒所居不過巡檢使之名終不以大將處之然得便宜從事此小其名而重其權也李漢超屯關南郭進控西川姚內斌董遵誨之徒所領兵皆不過五六千人然任之久者多至二十餘年少亦不減十余年比少其兵而久其任也結之以恩則其德深豐之以財則其力足小其名而重其權則其人爭奪於功名少其兵而久其任則人得竭其智勇故夷狄服邊鄙無事人共勇議和陛下欲偃武修文休息南北誠天下之幸

錄忠義

嘗謂忠臣義士如玉鎮大寶離然維於群玉之府人莫名其所以爲王也及夫祭祀則陳之大朝會則陳之神鼎玉璽尊爵

清肅然有威裨茲紉情亂寵靈社稷之氣忠義之士亦猶是也  
方先事時世人殆未有以名之也及遭变故臨大事蹈不測持  
義明壯截然不乱茲夫盜子望之失氣而宗廟社稷亟增泰山  
九鼎之重故為天下者雖有高城巨浸以為之防粟糧漕庾以  
為之備良士選卒以為之戰而微忠臣義士以為之守是委社  
稷而付之敵也臣故曰忠臣義士朝廷之玉鎮大室也臣竊念  
之自靖康建炎而來將帥守宰義人烈婦豈无捐軀徇國犯患  
觸譴負傑異之操如古人乎若不及時早加褒擢忠魂埃滅義  
骨冰漸歲月荒老无所討正此有志之士所以濡涕而切歎也  
伏願陛下申詔使臣採自靖康而來蒙患死難暴人耳目較然  
不欺者書之為死節之士復撫近日明詔之所蒐訪周行之所  
諭薦者書之為守節之士議者以為靖康而來閱幾歲所矣何  
以研覈而論次之臣謂孔子立乎哀定之間而書乎隱公九公  
之世至於宋史則上括魏朝隋書則遠包梁代是蓋詢縉紳記

錄之所傳訪父老年月之所接信以傳信疑以傳疑而君子猶將取之也臣謂今之史且是耳考郡縣之計書採史官之異說質文士之紀述參本家之行狀則邊鄙老卒豈元知段太尉之史乎書生詞人豈元記高隱女之烈者乎拾甲子年事豈元知李新聲之義者乎予以綴士於千百振已沉之幽憤亦足以討僭叛懲不軌建宏規立大範也此太史之例而又何疑哉漢高祖制詔御史長沙王忠其定著令逮元初永寧之末復徘徊引却不敢輒正号位者何也世之議者乃謂當操之時袁紹雖亡劉備猶在故操有所畏避而未贍自目觀之操之權譎豈知畏孫劉者哉特畏李固陳蕃李膺范滂孔融神明精爽凜凜尚在有以陰挫其脛而誅之耳孫劉曷足畏哉忠義之効如此願詔史官時加記錄庶幾彰國家臨厄有伏節之士勵世有消萌之術天聖中有顏似賢者唐魯公真卿之裔孫部使者以其名聞仁宗皇帝曰噫忠臣之後也其官之夫唐德宗投真卿於

希烈唐焰沸熾之中如棄墜甌无復顧惜而我仁宗多真卿之義乃管其終於數百年之後則仁宗之消萌壓難其意亦微矣

崇文

同前

劉禹錫之論斯文也其言有曰政虐而士裂三光五嶽之氣分大音不全故必混一而後振夫三代之文離於戰國而合於漢離於南北而合於唐方天下之勢剖分庵雜三光五嶽之氣翦然判渙而莫之合也故其形於文辭論著之間亦各僅有偏霸一隅之體亟復曹魏三祖橫驚而長驅齊梁數君爭盟而先軟然皆風辭輕靡意烈促弱未有龕世拯亂混一天下之意閱世雖殊聲貌相襲靡曼流蕩自切卑之巨嘗即禹錫之論以妄窺陛下之聖作本道德撫仁義推原父子兄弟孝友之實質質之以人倫礼義之際而達之於開物成務冒天下之間而以紀綱入彝陶正庶俗糾華緼戎撥亂立極靡然有提挈天地震縻宇宙之意且是以知三光五嶽之氣其離而復合乎三統五行之運其

微而復大乎又曰春秋稱王明三統也信乎陛下之再隆天命而恢正統也又曰文王質文自天祐之信乎陛下之再隆天命而恢正天統縱著文而一天下也且初伏願陛下垂厚德而明首深詔執事風厲學者以衰亂敝之習隸為深厚之文還西晉鴻臚弘雅之風起中興博太混一之氣非惟昭陛下之極功庶幾見斯文有補於當世

辨蜀

同前

自頃諸公論議多以蜀人為疑苟可以防閑沮遏无不為矣吾不知其說也以公孫述嘗有蜀乎是時王郎據邯鄲盧芳據九原劉永據梁宋隗囂據秦隴而秦豐李憲之屬不可勝數何獨蜀也以劉氏嘗有蜀乎是時曹氏據河南袁紹據河朔袁術據九江劉表據荊州孫氏據江表而公孫瓚宋度建之屬不可勝數何獨蜀也以王孟嘗有蜀乎是時劉隱稱南漢李景稱南唐錢鏐稱吳越劉崇稱東漢四司馬商王審知高季興之屬不可

勝數何獨蜀也議者以謂蜀有劍閣之險白帝之隘是大不然  
吳有長江魏有成皋趙有井陘燕有飛狐秦有崤函天下之險  
有其於蜀者矣而議者又謂有沃野之饒鹽鐵之富是又不然  
史稱秦地膏腴謂之陸海祿有魚鹽然秦戰國最爲強雄楚  
通百越擅三江五湖之利吳人鼓鐵燉盜通天下之富有甚  
於蜀者矣江左寇盜不止於推縱山東藩屏十倍於劉關甘陵  
之圍難拔於均順江津之謀易敗於逢育今天下無事大臣長  
慮却顧推自昔禍患之所從而並聞之此其意則是矣而獨施  
於盜則吾不知也

辨謗

同前

烏聲踏而和師曠識其樂牛馬悅而傳言虜情而哀太行之坂  
馬撼耳而長鳴則子陽健其才羅圈之墟虎咆哮而許則漢宗  
辨其非辜而逸之夫數物者乃天地間殊族異類也翼而雲飛  
足而野馳聲息氣味與人絕不相聞鑿而其狀然鳴轟然號音

韻聲濁又非若人言之的可曉者是數字者驟聞其聲而皆  
有以逆採其心悲感憂樂得諸音韻間但不啻對面語嗚呼異  
族無知之音乃若是其易曉惟古之人立己以誠故信於已不  
泣於物彼雖殊族異種弄聲吐音皆不能逃吾耳聽心受之際  
由是觀之入之言也雖靈夫巧眩出奇露性謂棘門之端可以  
造沐猴中述之衝可以浮美萍噓枯吹生竿頃間則吾必知其  
言如鳥之樂如牛之悲如馬之長鳴如虎之孝吼皆不能投偽  
妄以竄吾際惟是世俗子弗知古人心警或投焉則氣溢以怡  
毀或投焉則氣溢以悲嬰嬰戲至而悲慘交見眉宇間嗚呼若  
人者中之所存果如何哉吾嘗鑄詰古人所獨到處然後反而  
自信不以毀譽榮而中豁然無少吝觀其榆次勝下之辱狗曲  
擊坑之悲痛心者或羞焉古人則以此爲可羞也而何足羞盜  
嬖受金之毀吏諛婦翁之誠護名者或畏焉古人則以此爲可  
畏也而何足畏況我以盜而償金汚己以偷而服罪愛身者或

耻焉古人則以此為可耻也而何足耻援琴以鼓劬非端施之色而夜逃駟僮販夫所賤也而予者或為之搔癢蹂躪夜衿半單絞之服胖然無少顧避去夫莞子所鄙也而大雅者或為之嗚呼天下之汚辱垢賤莫此乎甚而古人曾莫之顧况下此其足卹焉下此者果不足卹則殊族異類之號鳴吾將奈古人而志之也雖然古人既往矣吾故書是以詔夫孝古人者而命之曰辨說

理窟

同前

政和二年冬仙井喻某來為閬中越四年秋作堂於縣治之東北隅揭之曰理窟且率子弟而詰之曰予自幼時讀昌黎先生書處莊其淺陋褊迫不入於道蓋嘗觀其符讀書城南与示兒之詩則曰一為公與相潭潭府中居又曰不問官高卑玉帶懸金魚嗟乎使退之善教其子弟則曰道德於我初不得以貴賤加損而窮達外黜者也而其言乃爾何哉常人之情有夜半生



子者亟仰天而祝之曰必爾必爾相是教其子弟竊聖人之道以餌爵祿者也若孔門則不然其子趨而過庭曰汝季詩乎他日又過庭曰汝季禮乎初未嘗期爲卿爲相也未嘗教之以竊聖人之道以餌爵祿者也予嘗遊觀歷世之士其勲業之隆磊萃業之鴻博文章之閎傑自有天地以來未始一日無也至求其高華閑曠蕭然自放於天地萬物之表如邵曼容黃叔度陶淵明輩則曠然百世而一遇焉而其高標逸韻足以洗塵囂於末流宗至味於淡泊高特公卿相與折節事之而後世士大夫固有終身想望其高風而凝然不可企及者是數公者其身非有高爵厚祿軋天下而從焉者也而天下後世聳慕之若此何耶至道之妙固常足於吾之一身道存焉則我伸而物屈我貴而物賤休吾之至貴公臨物則天地萬物其何足以勝之昔之得此道者則曰謨謀廟堂自不如亮一丘一壑自謂過之又曰第五之名何減票騎夫以廟堂之尊票騎之貴此天下之所共

慕而物之所不能抗者也而二子乃以匹夫之事當之則君子所以自重者果在內而不在外也予之作斯堂也蓋欲玩是理於枯窮淡泊之中自尔以來讀書不欲太多爲文不欲太工達事不欲甚解臨人不欲太察求官不欲太高謀生不欲太富唾吾而戒獲之不加怒笑吾而父兄之不加喜榮辱利害淡然无所經意則所重在我所輕在我死生亦大矣不得與之變則吾之心爲往而不暇以吾之有餘臨物之不足則天地一塵萬物一髮而太山秋毫可以了然而兩忘之矣故旦莫食罷未嘗不婆娑其間南望錦屏北望盤龍想少陵之歌詠魯公之游息房大尉之所經紀既足以道然一爛而張儀之所城孟蜀之所守王建之所爭願又足以感慨太息嗟乎天地之妙萬物之理古今之變初未始有定際也而拘滯之士乃欲以區區之身固執於其間其亦可哀也已烏乎安得六通四闢之士與之共論此哉

禮樂

同前

惟上踐祚之六年恩覃天區威軼海外遠至邇安上恬下怡尔  
乃搜求間遺制作禮樂陋綿邈之遺儀鄙薄于之古器愚竊求  
其所以制作之由殆不可見竊妄意其帝宮瑰寶清廟偉器莫  
匪一德之純儒白華成館青槐蔭市莫匪一德之後造元和獻  
詩淮夷奏雅莫匪一德之歌誦勒功河西雄奇洮水莫匪一德  
之事業而致然耶嗟乎此其制作之由而未盡也意其宋省南  
臺無一官曠職崔蒲黃池無一夫嘯聚東廩西市无一人惡乎  
南浦北鄰无一聲愁吟而致然耶嗟乎此其制作之由而未盡  
也意其春風調鼎武士辨魚而六尚之制修甘泉獻賦黃門論  
經而三衛之法備天錫聖衷并星衆聚與五緯之循軌乎甘泉  
之期順天之休與於衆人之來王乎嗟夫此其制作之由而未  
盡也意其爰滅養瘠義陶軒鎔革澆治薄堯醴舜醢九突突突  
流澤遠也西宮雍雍孝思嚴也臨邛恢儒道漢勝也圉圉空虛

刑罰出也宗學滿四京九族睦也三舍滿天下風俗同也惟是  
道隆業巨一至此極尔乃左顧右盼詔更命纂長軀直抵目堯  
舜而跳三代制磨天人鑄剔造化剗陋芟弊一新大典以崇盛  
德以揚偉烈以昭太平以示德意以對揚哉以武而詔後世嗚  
呼休哉伏承明問以上自二帝下迄漢唐真制作之本度數之  
迹下詢諸生愚竊以謂自三代以還帝王之制正如輕花浮雲  
飄空四散蕩然不可收拾歷觀秦漢而下越數千百載間人无  
上智慮礼無一圭撮樂無一音聲足以厭滿人意則有操戈聚  
訟而礼始疑側堂撓堂而樂益側新儀一試特以遏擊柱之戲  
玉律一調特以衍芝房之歌則後世之禮樂果何如哉延壽調  
律而京房喜阮成補解而公魯慙長沙少傅不知春澗之元流  
琅邪老儒來陪秋林之封豕則後世之禮樂果何如哉以今日  
之盛駿德在御其制作之妙且默面於造化之外置議司以講  
求鈇遺出帝指以明示制度礼制樂作洋洋乎三代如也又况

異士四來名儒輩出擷英執奇思眇天末闊視秦漢而下涉無  
人之境顧所謂元君章句元和新礼封禪之儀或取於倪寬之  
奏明堂之制或取於公玉之圖果足以獻於太宗伯之前乎識  
趙人之鐸聲辨周家之玉尺闊視空中而知春氣之至埋輪地  
中而應玉管之灰果足以獻於大司樂之前乎是其智識飄飄  
過出月外冥搜化主博取方類高出帝王獨到處回視秦漢而  
下其誠足取耶其不足取耶愚以謂帝王之典具在方冊然五  
帝異樂三王殊礼不龍礼是則禮樂之制應時而造自  
今觀之九鼎之制所以統御神人變調造化而帝鼎居中獨為  
重鍾肇興制度自我作古雖咸韶漢武之制曾不足以踵門而  
獻巧况秦漢之紛紛乎嗚呼兩生高卧而漢制微三五啗亞而唐  
制鉅後世之士知罪四子而初不知夫禮樂之興固自有來處  
蓋禮樂大典必積德百年而後興彼其時君世主德業脩薄不  
足以堪耐此事雖使周公左召公右亦焉能遽回其衰微而振

起之然則四子之罪固不足繫頸而誅之也國家世世相承行  
二百年德隆業俊眇無古昔彼秦漢而下正可奚童而視之則  
禮樂之典誠在今日顧天下之士獻群魯之宏議草茂陵之遺  
奏交馳於門閭之下者何其紛如也承學之士亦復有難汾陽  
之遺鍾識古家之銅器過求輿里而知大常臥吹之笛視樂工  
圖而得寶裳聚仙之拍輒欲以區區薄技少慶盛時之難逢惟執  
士略其謬悠而與進之

冗官

昔延陵季子觀於晉之境曰嘻力屈哉國乎夫以全蜀被兵歲  
月淹久細民葦然物力肆既軍資匱乏老弱路病是豈非力屈  
之國哉且蜀與國也吾戰數矣士罷於溝壑吾師老矣民困於  
餓殍然而學士大夫不能於此時恤民之急其在上者轉階喻  
高唐稍愈厚直在下者飢殍而流離危苦而愁然其何以責之  
以死守蜀而不去乎楚莊王欲伐晉使豚尹觀焉反曰不可伐

也其樂在上其樂在下即今日四川之勢而觀焉其樂在上其  
憂在下所以去者何以蓋今之群士大夫迂階太高而不復辟  
增徵過優而不知止至如津運米船固是監司今職增添酒課  
亦是州縣常事職則當爾功何足云而其設心措意迺以寇賊  
疆域爲謀身之資軍洩洩興爲自售之計其於國家之屯厄若  
不爲知民力之利弊殆不遑恤則是吾士大夫幸時之否以  
爲通斂民之哀以爲樂也不亦異乎且中大夫中奉大夫中散  
大夫之在四川者不可勝原也文繡溢於園鹿而士夫享千石  
之鍾筋力不於溝壑而細民無一旦之食上下之勢偏駁如此  
一旦舉事而欲與之共死生同患難龕連寇撥荒穢顧不難哉  
夫水濁則魚困官冗則民亂事要則易從法簡則易行且蜀之  
力何以屈兵屈之乎非兵屈之冗官屈之耳非特冗官屈之士  
大夫之濫賞者屈之耳其竊寄安商今日之勢天陰未東國步  
方便軍事搶攘未便偃息吾民應辦未便無事講析計未便

曆省論功行賞未便周偏又復兩賜不特農事寡緣困虛空寒  
餒軍去薄於是有屯兵之役於是有運米之役於是有軍器之  
役於是有管田之役此四役者困無可奈何四川父兄其心安  
焉不為異也所深異者官之冗賞之濫濫與冗偕焉取人之父  
兄子弟所以相養活之具從而潰敗磔熬之吾國幾何其不屈  
乎吾國屈矣於何而可以伐人之國乎自昔茲曩斥邑而論之  
內外酒官監官及添差官已三倍於平時州縣官之常數矣然  
則吾國安得而不屈乎夫酒官之議謂可以盡去者偏說也謂  
不可少減者飾說也飾與偏非通論也不能定所去以人言去  
不能定所取以人言取則飾而偏之說雜焉莫能判也其意媮  
其舉不果其議論不決則飾與偏之說眩焉莫能離也嗟乎酒  
官之議小事也容容默默久而未判者何也蓋羣士大夫有所  
謂畏焉者矣有所謂私焉者矣畏焉者不敢議慮都運司有以  
善之也私焉者不復設利都運司有以飽之也畏之徒十之三



飽之徒士之三而本司屬官又從而飽其親戚故舊則酒官之  
數何由而可省也酒官之設以久不能判者士大夫不平其  
心之過也吾將解國而平其心因時而揆其理酌今日四川事  
勢勑力財困穀稼鮮耗而觀焉則可以存可以去不運籌不下  
席而去取之理了然異矣且四川自奉朝廷恩澤詔裁樽酒官  
幾一年矣州縣悠悠不即奉行者畏焉與利焉之說交焉耳齊  
景公問於孔子曰秦穆公僻小而霸何也對曰其至果其令不  
偷由是論之非將省酒官也使天下之事其至皆果其令皆不  
偷而又中弱焉懼而不可以代人之國乎若夫轉官之弊其抑  
省私商之矣自朝議大夫而上固有止法此祖宗舊制也軍興  
而來官職漸輕故有改官未五年而已奉直大夫矣外朝未十  
年而已中大夫矣其故何哉良由學士大夫幸時之否以爲通  
欽羨之哀以爲樂也此風一扇流宕滋甚漫漶放紛不可收拾  
今日猶可柰後日何今歲猶可柰後歲何然則在上者其可不

少爲之節度乎今設所以存之爲夫所以省之則奈何莫若存其名而去其實可也所謂存其名而去其實則何以夫所謂中大夫中奉中散大夫者虛名也祿廩之厚奏補之優者實利也或以運米或以軍器而轉行中散大夫以上者姑與之可也雖許轉出散大夫以上而祿廩之數奏補之限姑視朝散大夫焉可也審如是則在上者有以抑之不獨樂也在下者有以裕之不獨憂也夫士民之所以叛者由偏之也今則上焉者不獨樂樂其生者百姓與焉下焉者不獨憂憂所以恤百姓者士大夫與焉惟朝廷之盛德而公布乎岷峨江漢之間吾國之財可以不屈矣於是乎可以伐人之國矣設若謂唐德宗以試官虛名無損於事陸贄奉奉以爲不可今中大夫位視大卿而中奉大夫亦大卿之亞也品列之崇恩數之異豈特試官之比廼欲以爲虛名而用之不已戲乎其則謂軍興以來中大夫中奉大夫中散大夫其名已輕爲日久矣孝士大夫蔑然視之若毫釐之

輕則在上者雖欲加銖兩之重於其間豈可得哉愚之所以姑  
爲此說者正以裁祿廉節陰補以紓吾國力屈之弊耳然特一  
切之制也夫一切之制軍興以來所以行之者非一條也何獨  
於此而遴之區區妄論如此仰惟鈞慈熟計之

新刊 國朝一百家名賢文粹卷第五

新刊 國朝二百名家賢文粹卷第六十六

策

時議策十

君道

誠齋先生

臣聞人主之治天下必正其爲治之主人臣之相其君必先正  
其人主之主而小大敵國而欲傾人之國也必先敗其入主之  
主而已齊人懲於夾谷而謀魯也不以齊謀魯也以魯謀魯也  
魯以女樂麗朝而孔子行則先敗其用孔子之主也孰爲用孔  
子之主也非魯君之心乎越人懲於會稽而謀吳也不以越謀  
吳也以吳謀吳也吳信宰嚭而子胥踈則先敗其用子胥之主  
也孰爲用子胥之主也非吳王之心乎是故人主之有天下如  
富家之產也人主之有一心如富家之有家主也今也有千金  
之產而其家主者博奕弄酒色焉而不逞之奴客押而不嚴焉  
則其千金之資人孰不視之爲外府耶而其友之忠焉者不先正

其家之主而欲扶其主之家是故枝其東而西傾富其左而右  
貧世之君子之相其君也不過曰人才之未用也民力之未裕  
也國未富而兵未強也太平之未有期而敵國外患未有已也  
是皆知扶其主之家而未知正其家之主也古之君維艸守文  
不知艱難而敗其國者臣未暇言也請言其創業之難而又自  
敗者隋文帝取陳以混二百年四分五裂之天下開皇之治侯  
以來僅有此尔其仁賢何如也唐莊宗與梁對壘於河上不解  
甲者五六年百戰而氣不折卒以滅梁其英雄何如也二君者  
創業之難如此然皆身不免於禍國不免於亡夫隋者文帝  
也亡隋者亦文帝也滅梁者莊宗也自滅者亦莊宗也君一君  
也而興亡成敗之自異也蓋前日之文帝前日之莊宗正其主  
也其主正則國從而興後日之文帝後日之莊宗自敗其主而  
已矣其主敗則國有不敗乎蓋二君者天下之主也二君之心  
者二君之主也勤儉創業之心一變而為逸樂棄成之心主以

敗矣當其惑於女子嬖於伶人二君自以為无害也然女子伶人之禍一發則橫潰決裂而不可收卒以殺二君之身而覆三國之祀則天下之所以治乱存亡者夫豈階於外哉亦視其君主之如何耳今以天子之聖明仁孝而加之以典章之緝熙兢業如舜勤儉如禹不迷声色如湯不盤孳遊畋如文王則所以正心誠意以立其致治之主者至矣臣猶首以為言者蓋聖人之防其心不恃其天而盡其人不傲於危而傲於安今日邊事小息矣憂顧小紓矣外息而內紆此治乱安危之所伏而未測者也豈無以新聲麗色而娛上之心者豈無以伎巧玩好而蕩上之心者豈無以弋獵毬馬宮室苑囿而迎上之心者臣不敢疑也而臣不得不懼也漢文帝之賢而成康孰先孰後也數朴勤儉一無嗜好顧獨稍好射獵未損帝之賢也而賈誼諫之曰不獵猛獸而獵田鼠詭細娛而不圖大患可為流涕賈山亦諫曰願少衰射獵修先王之道不如此則行日壞而榮日滅二臣者所以

責文帝備也非責帝之備也愛帝之金也巨願聖天子戒此等之細誤而求聖賢之至樂以召天下蒼儒正學之臣與之探討古今之聖經賢傳以求堯舜三代漢唐所以興亡之原而擇其中以之正心修身日就月將聖德進矣則三帝三王之治涵養於聖心而周流於天地敵國雖強其強易弱也

### 國勢

誠齋先生

臣聞善立國者以人成天而不以天敗人蓋國之所以廢興短長者天也而所以使其廢興短長者非天也人也惟人爲能成天惟天亦能敗人非天之敗人也人實恃天以自敗而天亦不能如之何也且夫國於天地有爲立焉古之國蓋有至弱而存者有至強而亡者蓋有一再傳十餘年而遂滅有三四十世七八百年而不絕者夫強者宜其不可亡一再傳者皆艱難創業之君宜其不可滅而乃至於滅亡者何也弱者宜其朝不及夕

傳世至於二三十君之後大抵不驕則怠宜其无以自立而力  
至於長存又何也求之而无其形究之而无其端故曰天也國  
一國也有祚廢而今興有既亡而復存君一君也有朝焉而暮  
強有前衰而後盛夫豈不以人乎哉故夫善養身者能延既絕  
之年善謀國者能延既衰之祚人之所至天亦至矣故曰人也  
自堯舜禹湯文武之為國計與孔子孟子之徒為世主言者大  
抵言人多於天而言天寡於人則憂矣有國者之以天敗人也  
臣竊觀天眷我國家已往之驗以下方來之祚則知商周歷年  
之數未足為國家喻也臣蓋喜而憂之喜之者天也而所憂者  
人也方逆虜為靖康之役彼謂天下先復國家有也而民心依  
依戴其舊君我是以有南京之立方逆虜為維揚之役彼謂淩  
入窮侵之計不淺也而風潮効靈一隔千里我是以有海道之  
安方逆亮為江上之役彼謂投鞭於江可以利涉也而千艘一  
炬虜酋授首我是以有江海之捷則天之維持全安我國家者



慮危而愈不危愈垂而愈不拔其眷顧何如也則國家子孫万世帝王之業了然在人目中矣雖然天之所以天者天矣而人之所以人者果尽也耶臣不得而知也果不尽也耶臣不得而知也巨憫惟夫赤白囊一至則廟堂騷然而失措其所未有備某所未有共募市人招武勇以為臨時應卒之計講解之義一許則君臣歆然而相慶寵我莫敢舟師徹邊防息憂願以享安逸无為之樂既君臣欣然矣而邊塵又動也則騷然之色復見既廟堂騷然矣而和議又集也則欣然之心復生此何為者耶千金之家不幸而大盜為之鄰前有父兄不共戴天之讎後有尽盜吾千金之產之意彼大盜者日夕聚惡少治兵刃伺間隙以圖我而未有以乘也則陽謂我曰吾焉若為好也所謂千金之主人者將遂毀藩墻投挺刃晏然般樂飲酒而不為之慮乎抑將外姑与之好而陰益為之備也嗟乎千金之子能不忘於盜而為天下國家者不能不忘於敵天下之憂復有大於此者乎

則所謂以人成天而不以天敗人者臣所不敢知也蓋臣聞之  
古之敵國對壘而未有息肩之期者其處之之大略有四一曰  
謀二曰備三曰應四曰墮何謂謀畫不甘食夜不妄枕君臣日  
夜感頌相顧以敵讎未滅為大憂以天下未一為大耻以宗廟  
社稷未有方世不可亡之實為大懼收召豪傑選馬勵兵深謀  
密計期於必取所謂卧榻之側豈容有息肩雷鳴者太祖皇帝  
所以建一統之業也何謂備謀人而羽翼未成也機會未至也  
釁隙未生也則遂不謀人也耶我不彼謀彼必我謀是故防之  
也豫而備之也周修政刑求人才深溝高壘積粟治兵恐懼儆  
戒常若一日而敵三至也夫是以有屹然不可搖之堅動則可  
以制人靜則可以不制於人為客則可以百全為主則可以万  
全矣孫仲謀講之所以走曹操也何謂應欲為謀人而不能卒  
欲為備人而不能勞政事紀綱守其常兵甲士馬因其舊而固  
不臣於大治而亦不至於大亂敵不至則不慮其至敵至則徐

應其至夫不慮其至而徐應其至者非有万金之素也尺於一  
決以幸一勝尔故其勝者幸也非計也宋文帝之所以支佛狸  
也何謂置既不能謀又不能備既不能備又不能應苟於安而  
不知危伏於中媮於樂而不知憂寓於其間狎於敵人之詐而  
不候隙於敵人之計而不疑至於覆亡其國則曰天也吳之所  
以誤於越也謀之者其國興備人者其國安應人者其國僅存  
而墮於人者其國必亡有國者可不深懼而謹擇於此四者乎  
臣竊觀朝廷今日之大計而深所未諭也謀耶備耶應耶墮耶  
蓋亦不出於應而已矣敵至而能應愈於不能應非不可也而  
未善也何則緩而始募殺渴而始浚井得為善理家者乎且平  
居不為万全之策而緩急乃幸於一勝之功可以勝也而不可  
以必勝也可以幸也而不可以數幸也臣懼朝廷今与虜人議  
解之後輕信其情而不防其詐也歷下之兵一解而津陰之師  
至鴻溝之境一分而垓下之禍依此往事明也臣願朝廷深為

之備以待不測之警而後立國之大計得次第而陳之

### 治原

臣聞爲國者其患在於有敵而無暇有敵而無暇則其亡也不固而其應也不詳非立之不固而應之不詳也欲固而無暇於固欲詳而無暇於詳也何也有敵而無暇則休息之日常不加多而戰鬪之日常不加少戰鬪之日多故君有負薪以立田者操兵以耕而守者被介冑以卧休息之日少故有心不及運有口不及議而有智有勇不及施夫如是立安得而固應安得而詳哉天之生万物者春也而生春者非春也日之明萬物者晝也而生晝者非晝也春不能生春則生春者冬也晝不能生晝則生晝者夜也何也冬者天之暇而夜者日之暇也然則和者戰之暇也欵雖然爲國者患无其暇亦患有其暇有其暇而用其暇者暇也有其暇而安其暇者偷也是故暇能福人之國亦能

禍人之國孟子曰國家閑暇及是時明其政刑雖大國必畏之  
此用其暇者也又曰國家閑暇及是時般樂怠傲是自來禍此安  
其暇者也越王會稽之役請成於吳吳以為真請也不知夫越  
之將來其暇而用之也是故王女女於王大夫女女於大夫士  
女女於士勾踐不耻也輸以寶器玩以女樂勾踐不愛也惟不  
耻故有以復其所大耻惟不愛故有以保其所甚愛會稽之棲  
耻之大也社稷之存愛之甚也夫惟其小者無所耻无所愛故  
國中民疾者吾得以問死者吾得以葬富貴者吾得以安貧者  
吾得以與賞罰物備吾得以審車馬兵甲五得以具夫是數得  
以者盡而吳固在其股掌矣彼夫差者方且疲於伐齊之行驕  
於潢池之會而不知越人固已制其死命蓋越得其暇而吳不  
得其暇越用其暇而吳無暇之可用此之謂暇能福人之國北  
齊與周不兩立也非齊併周則周併齊爾而齊王恃周寇之少  
息君臣謂一日取快可敵千年至有無愁天子之號周師之克

晉州也猶曰小小交兵乃是常事故齊亡陳之與隋不並存也  
非陳併隋則隋併陳尔而陳主恃隋人之交聘君臣謂王氣在  
此敵何能為至於縱酒賦詩而不輟隋師之濟江也陳主尚醉  
守江者亦醉故陳亡此之謂暇亦能禍人之國今天子即位五  
年於此矣頃者天子之所以宵衣旰食公卿大夫之所以竭心  
盡慮者惟強寇一事而已至於法度紀綱教化刑政之具所以  
開中興而起太平者皆未及也非不及也無暇於及也今者講  
解既成邊候不驚是猶謂之無暇坎有暇矣而廟堂之議所謂  
法度紀綱教化刑政之具又不及焉臣不知廟堂天子之所以  
宵衣旰食公卿大夫之所以竭心盡慮者何等事耶將以講解  
而偷朝夕之安耶將未忘中興之計而猶有意於堯舜三代之  
治也若曰偷朝夕之安則齊陳之禍可以懼矣孟子之言可以  
儆矣若曰未忘中興而有意於太平之治也則臣不知其未忘  
者何策而有意者何議也臣但見今日法令曰申明條法而已

明日出令曰士民不得服涼衫而之不知天下之事猶有太於此等否耶臣甚懼焉昔晉武帝臨朝惟談平生常事而不及於國家遠略何曾知其必亂王導辟王述爲掾既見首問米價君子是以知策之不振也今日之施設得无与談常事問米價類乎夫無暇則憂有暇則休天下之事百變如雲萬轉如輪一旦敵人又動則又曰無暇臣不知法度紀綱教化刑政之具所以開中興起太平者何時而可議哉詩曰淇則有岸隰則有沚今欲治而茫無畔岸臣欲不懼得乎

入才

臣聞才之在天下求之之法愈密則愈疎取之之塗愈博則愈狹然則天下之才果不可求乎古者一代聖人之興則一代之人才亦從而興夫豈不求而自至也然聖人者度越世俗之拘牽徹藩牆去城府神傾意豁以來天下度外奇傑之士故才者罪起不才者自伏後世之君以爲天下之人率將欺我而不可

信於是立爲規矩創爲繩墨以敷揚澄汰天下之士取之不勝其精而實粗得之者皆截然入規矩中繩墨而奇傑之士皆出於規矩繩墨之外故求治而莫之與治遭亂而莫之與除紛紜膠擾而卒不能成功然則天下之才求之安事於密而取之安事於博哉蓋密則必有所隔博則未離於密也國家自祖宗知規矩繩墨未足以羅度外奇傑之士也是故進士任子以待群才制科以待異才得人蓋不少矣然自制科中罷而復行今四十年而竟未有一士出而副側席之求此其故何也無乃今之制科非古之制科歟無乃不用規矩繩墨而規矩繩墨愈急歟故臣嘗謂今欲求制科奇傑之士夫惟有所不求斯可以求之矣昔者西漢制科之盛莫武帝若也嘗求其所以策之之說則曰上嘉唐虞下悼桀紂而已則又曰禹湯水旱厥咎何由而已何其甚乎而無難也非無難也不暇於難也夫武帝者方夙寤晨興以願聞治道之要之不暇而暇搜羣簡摘屢辭以爲苟難以



與畫星角一日記問也哉今則不然先命有司而試之以莫知所從出之題旣又親策於庭而雜之以奧僻奇恠之故事不過於何晏趙岐孔安國鄭康成之傳注與夫孔穎達之疏義而已此豈有關於聖賢之妙學英雄豪傑濟世之策謀也哉以訓詁之苛碎而求磊落之士以蟲魚之散殊而釣文武將相之才不幾於施鱸鱖之苟以羅橫江之鯨掛黃口之餌以望鳳之來食也耶不至固也非惟不至也亦不能也非惟今之士不能也雖使古聖賢如孟軻者復生亦不能也孟子之時去周之盛時與今孰遠也孟子與孟獻子相去尤近也諸侯惡周籍之害已而去之孟子已不能記其詳孟獻子之有友五人孟子已忘其三孟子亦安能中今之制科也哉夫孟子者固无事於此能也孟子則有所能者矣孟子曰如欲平治天下舍我其誰韓子曰孔子以是傳之孟子此孟子之所能也今不求天下之士爲孟子之所能而求其爲孟子之所不能則是其所求者非其所求也

故曰今欲取制科奇傑之士夫惟其所不求斯可以求之矣且朝廷以此等求士而不得也求而得則亦爲尸死帖帖者爲哉張華能對千門萬戶之問而不能救賈石司馬倫之亂前之敏後之瘠小之明大之暗臣愚欲望朝廷參之以祖宗漢唐制科之本意立大端而去細目使士之所治上之爲六經之正經下之爲十七代史與諸子之書而前去傳註奧僻之問其學則主乎有用其辭則主乎去諛上及乘輿而不誅歷詆在廷而不怒使天子得聞草野狂直之論而主專意乎興亡治亂經濟之業庶乎奇傑有所挾者稍稍出矣議者曰求馬者非求驚也求駿也今去其難而純乎易則懼驚者之至如之何是不然求馬者求其一日千里乎抑將求其他伎乎今求馬者不問其能千里與否而曰吾欲其能操蚤捫虱搏鼠而擒兔也可乎士之能庾辭隱帙者豈曰奇傑而奇傑之士烏在庾辭隱帙之能不能也雖然臣猶欲有言焉士固有挾策謀而不能乎文辭有能乎

文辭而不肯入有司之刀尺苟軍旅之間委諸將以薦謀臣才  
士不間於文與武仕與未仕而諸郡大比之薦名輟進士定額  
十之一以其半而試士之能古文有略倣宏詞之體以其半而  
試士之知兵獻策者略倣武舉之制上之於宗伯而取之視進  
士之科名焉其數不出乎奏名之常員而不羈之士未至於橫  
弄其輿以聲病之文而取科級者不猶愈乎如此其猶有遺才  
焉臣不信也

論將

臣聞聖人之所以鼓舞天下使之奔走淬礪以爭先為用長治  
而不亂有急而不可乘者蓋聖人不恃天下以其可窺而作天  
下以其不自止如此而已矣果不可窺也宜乎天下之不自止  
也天下所以作之不起未起而復廢者吾之可窺者見而彼之  
自止者隨之今天下之所以患於无才而才尤患於无將其病  
在此方邊事之興茫々然以求將也天下則以茫々然趨之天

下趨之而朝廷不求將矣非不求將也邊事息而无所事於將也无所事將則天下亦弛然曰无所事我則亦弃而之他剛者柔勇者怯而柔怯者有不勝其柔怯矣高者趨文科以售其身而下者伏於農商矣其精銳果敢者有所挾而莫之用則去而爲盜矣天下弛矣而邊事又動也而无所將也則又茫茫然以求天下而天下莫之趨也夫前日之无所事也所以爲今日莫之趨也歟夫如是焉得將昔者成王周公承文武平定之業誅三監征弗庭而天下復矣於是酌堯舜夏商之禮樂法度補葺成就以至於大備當此之時文物煥於朝頌聲被於野太平之美天下之所甚樂而成王周公之所甚懼非懼夫太平也懼天下之窺吾君臣之樂夫太平而彼亦樂之以至於亂也則有大司馬之官日夜選將閱戎如是而爲車如是而爲徒如是而爲載鐸鑼鑿如是而爲坐作進退後至者誅不用命者斬夫大閱者非真臨陣而應敵也而後至者何至於誅不用命者亦何至於

斬哉而其法如此蓋其所以處暇裕之日與三監未誅之時  
無異也則天下何以窺上之无所事我而不為也哉是故文  
武並用而莫知其孰先而莫知其孰後不見其所甚好不見其  
所不好才素備而無一旦之憂後之君臣狃於治而謂天下不  
復亂也則曰我不逢高帝時万户侯何足道哉而羽林子弟授  
經於孝校與夫將軍不好武而其子皆能文則君臣相慶以為  
太平之盛觀而腐儒曲生又從而諛之曰兵寢者二帝三王之  
極功也不知夫二帝三王之不如是也諛說之誤時世也諛說  
盛於下君臣怠於上而天下以兵為諱以武為慙矣棘門灞上  
之無人而開元天寶之末狼狽大敗者无恠也非天下之無人  
也上之人以其可窺而弛之使其自止也今日之事邊警息矣  
天下將曰朝廷无所事兵矣此可慮之機也臣願天子增重武  
事不致於有事之時訪求將才不啻如有事之初而宰相大臣  
亦折節以下才略武勇之士无責其鄙野之狀而无怒其桀岸

之氣時賜之燕閒而延見之探之於其中而試之於其外以陰  
求天下之奇傑待之異而養之久此所謂不示天下以其可窺  
而作天下以其不自止者也則緩急之際亦何至於茫茫然以  
求而求又不得哉

新刊 國朝一百家名賢文粹卷第六十六

新刊國朝一百家名賢文粹卷第六十七

策

時議策十一

論兵

誠齋先生

臣聞天下之兵必有所歛有所散有所歛所以集天下有用之士有所散所以去天下無用之人不集其有用則兵不強不去其無用則兵不精明乎歛散之說而兵制無遺策矣臣請言歛之之說蓋歛之之說古之爲歛者處其一今之爲歛者處其三何謂一蓋三代之兵出於農此所謂一也兵出於一古也然可用之於古而不可用之於今也蓋三代之時內守以諸侯外守以四夷無敵國之嫌并無匹夫之崛起故其兵以心而不以力以義而不以詐其所以爲勝者非後世之勝也以吾之仁勝彼不仁以吾之義勝彼不義不特行陣而勝負決矣故所謂一者

古可用也何謂三曰召募曰子弟曰盜賊此所謂三也然古雖  
未用今不可不用也今夫兩軍相當詐力者勝則夫三者之兵  
不可以不用也非惟不可以不用也亦不得不用也母以天下  
觀之而以一鄉觀之今夫一鄉之中有所謂良民者有所謂黥  
民者耕而食織而衣循循以爲謹厚默默以爲忠信犯之有所  
不敢校辱之有所不敢怒此良民也不耕而求飽不織而求溫  
平居博奕飲酒以肆其不逞有急則推埋剽奪以快其意此黥  
民也夫良民者誘之以爲非固有所不敢而強之以戢鬪之事  
則亦沒世而不能黥民者放之則其竊發有所不可制收之以  
爲兵則其爲用亦不少今欲弃其爲用而不少者而強其沒世  
而不能者死乃交病也欤且黥民不收之以爲兵其肯老死而  
不動乎抑將猖狂潰冒以至於大亂乎與其至於大亂孰若收  
之以爲吾用哉何則收之以爲吾用則其猖狂者不流之於我  
而范之於敵其不肯老死者不用之於鼓墮而用之於功名此



駕馭英雄之至術也故其所謂二者今不得不用也如是者豈可不擇其所以歛之者耶臣請復言其散之之說蓋散之之說有實未嘗散而宜散者有實已散而名不散者實不散而宜散者凡兵也實已散而名不散者虛兵也何謂凡蓋以十而擊一則十者衆一者寡矣宜乎十者之勝也然一有時而勝十則老壯之異也以一而擊百則一者愈寡百者愈衆矣宜乎一者之負也然百有時而不當一則勇怯之殊也老壯之相去至於相十而勇怯之相遠至於相百而吾則一之是則一軍之士絕多補少而計之食者十而兵者十之三四也無事則蠹國而有事則敗事朝廷亦何便於此也此凡兵實不聚而宜散者也何謂虛蓋其名存其人亡其人亡其食存夫有名而無人無人而有食則其食鬼食之耶則亦有私之者矣某與某死者也而其籍則生也某與某逃者也而其籍則居也某與某未嘗量而至於也而其籍則已募也彼執籍以責吾食而吾亦按籍以餽之食

一軍之士而子虛烏有之徒居其實之三四焉是故縣官有真  
廢而無實兵主將無實兵而有實利主將則利也縣官利乎哉  
如是而國不貧民不病者先之此虛兵實散而名不散者也如  
是者蓋亦講其所以散之者耶今朝廷乃募之法行故鄉里之  
黠民有所收子弟之軍用故營壘之黠者有所泄盜賊非大惡  
者不殺而賞之以爲軍故山林之匹夫不至於爲亂教而擇之  
將皆卓然可用此歛兵之至計也朝廷既行之矣雖然猶有可  
散者臣願朝廷每歲不測遣侍從臺諫一人忠而有望者出諸  
軍行視而檢押之則虛冗之弊可以少革也蓋行視必於教閱  
之地而檢押必於司藉之人何則軍之老壯勇怯雖不可以盡  
見而教閱之地亦可以槩見焉至於生存亡雖不可以遽知  
而貴之司藉之人則彼莫不知焉從其可槩見者而沙汰焉從  
其莫不知者而開之以首實待之以賞罰焉則冗者何患於不  
散而虛者有何敢以復存哉去冗去虛而實兵見矣此散兵之至計也

取吏上

臣聞厥今取吏之難莫難於禁賊吏蓋朝廷亦求所以禁之矣而未得所以禁之之方寬以養其耻則膏血上之寬而不知畏繩之以法則慮其怨而不服抑將何以處也臣以謂用寬不若用法用法不若先服其心天下心服而後法可盡行賊可盡禁也夫何故天下之所以服者常生於不偏而其不服也當起於不平孟子曰夫子教我以正夫子未出於正也已不正而正諸人父不能以行於子也欲正天下而不出於正何以服天下哉且所謂欲正天下而不出於正者誰也豈非朝廷之大吏耶大吏而不正不正而法不行也而欲舉法以禁小吏宜其怨而不服也故臣何以知大吏之不正異時臣之所聞見者有二一曰私鬭官之贓以自入二曰公苞苴之賂以自富天有十日人有十等朝之不可名以哺晝之不可名以夕童子知之至於公卿之不可名以皂隸侯伯之不可名以輿臺則公卿之與侯伯有

不知焉何也且天下有君子有小人小人非君子則莫之使君子非小人則莫之事莫之使則不養莫之事則不尊是故朝廷之於君子則尊之於小人則養之蓋養小人者所以尊君子也尊君子者所以貴君子之自尊也禮義廉耻豈非君子之所以自尊者耶而與特下自臺省僚屬上達於公卿侍從有所謂宣借之廩給焉有所謂白直之餐錢焉夫所謂宣借白直者所以養小人而使為君子之侍御僕從也今也死其人而取其食其大官至月以數百緡計則是公卿不為公卿而以皂隸自為也侯伯不為侯伯而以輿臺自為也名為朝廷之大吏而實為皂隸輿臺之小人不知公卿侍從亦何忍自處其身於此也死他貨之所在焉耳此所謂私縣官之賊以自入者也都城之有間所以誰何者一夫之異言異服而入者則問持千金以過者則征而四方之所謂苞苴者雖其篋百金孰有問之者哉不惟百金也千金亦不問也萬金亦不問也非不問也不敢問也

爲不敢問也視其書與籀之紙題或曰上之於廟堂其官也  
或曰省部其官也或曰貴近其官也夫何敢問且夫所謂乃金  
千金者何出哉將帥三軍之給以國權寵也監司守令攘公  
盜民以求美遷也此則受之彼安得不剝而攘之天下之箱篚  
肩相摩於道而其入國門如海水之沃焦公卿曰吾不受苞苴  
也侍從曰吾不受苞苴也貴近曰吾不受苞苴也而臣見其入  
也未見其出也則將誰受之耶此所謂公苞苴之賂以自富者  
也昔者漢宣帝之時屢下詔以戒吏貪而必及於省卒徒以自  
給者皆禁止之帝之英明亦察見於此則貪吏破膽矣陸贄之  
秉政至於藩鎮之靴鞭亦確不受雖德宗喻之而不奉詔以爲  
靴鞭之弊必至於金玉則今之卒徒自給者恬不之禁而箱篚  
之大於靴鞭者亦熟視而不問此何理哉大吏不正而責小吏  
法賂於上而詳於天下之不服固也是故用法自大吏始而  
後天下心服天下心服則何法之不可尽行何賊之不可尽禁

哉

取吏下

臣既言用法自大吏始然則小吏之法以遂行乎曰未也不有以予不有以奪不有以利不有以害千金之子豈其一身能運千金之資也哉必有爲之謀畫者有爲之奔走者有司其管籥者有司其舟車者无是數人則千金之子不能一日以理其家雖然樂於人之爲用而不樂於人之爲費已則膏粱而忘其人之飢已則綺繒而不卹其人之寒至其欺而盜焉則從而營之此其勢非弃而去則必不爲之尽力矣夫人主之於百官下自一命之賤而上極於宰相之貴此用天下之名也約而爲斗粟豐而爲萬鍾此用天下之實也實而名偕則實輕而名重天下斯捨輕以就其重名儉於實則實重而名輕天下斯就實而去其名理固然也人惟伯夷也而後能首陽之節然伯夷之後未見伯夷也而天下又安能人人而伯夷哉故雖聖人居人之國

饑而不能出戶亦不辭其君之餽粟以爲廉而欲天下之士不食而獨清可乎今天下之吏祿二帛之薄尉月給至於踰百緡而二廣之縣令不及其半至於江淮荆湖則又往往異而縣不同蓋有豐不勝其豐而約不勝其約者矣士之貧者扶老携幼千里而就一官祿既薄矣而又州縣之充足者上官之見知者則月有得焉其或州縣之匱乏者上官之私怨而不悅者有終歲而不得一金且夫假貸以往也而飢寒以居也狼狽以歸也非大賢君子誰能忍此而曰尔無貪吾有法豈理也哉是故臬若均天下之吏祿使其至遠者如其近者增其寡者如其豐者如此而猶不改則吾之法一用而天下大服然則行法當如之何臣聞天下之君子以禮耻之而有餘至於小人以刑威之而不足厭之而不足則必有不測甚大之威而後可蓋嘗見士大夫與臣言有七官嘗提舶於海邦者而以賄聞鞫之得實覆奏於朝有命答其背而黥焉其同列者念其非所以示所

臨之吏民也則諭之使自裁而其人曰免死幸矣咎而不黥不足作也小人之不畏刑如此頃者聖天子臨御之初蓋嘗咎一郡守之賊者矣而天下至今賊吏愈多也則不測甚大之威不可不用也恭聞太祖皇帝初平嶺表有守英州而賊七十万者特詔并市又有知衡州而賊得寔者今伏法於衡州臣願天子奮不測甚大之威不問吏之小大取其效而尤者二人殺之則天下之人震慄而莫敢爲矣夫賊者千而敗者一幸而敗矣又曰不忍殺也夫固不畏刑而畏死也不懲以所甚畏而投之以所不畏天下何憚而不爲賊吏乎臣故曰天下心服而後法可盡行賊可盡禁也

### 選法

臣聞吏部之權不異於宰相亦不異於一吏夫宰相之與一吏不待智者而知其遠也既曰吏部之權不異於宰相又曰亦不異於一吏者何也今天進退朝廷之百官賢者得以用而不肖



者得以出此宰相之權也注擬州縣之百官下至於簿尉而上  
至於守貳此吏部之權也朝廷之百官自非大利異等與夫進  
士甲科之首者不由於吏部而未有不由於吏部而官者今日  
之簿尉未必非他日之宰相而況今日宰相之所進退者臺閣  
之所布列者皆前日之外階揖侍郎者也故曰吏部之權不異  
於宰相雖然吏部之所謂注擬者何也始入官者則得簿尉自  
簿尉來者則得令丞推而上之至於幕職由是法也又上之至  
於守貳由是法也其宜得者則曰應格其不宜得者則曰不應  
格曰應格矣雖會闈者疲懦者老耄者乳臭者愚無智者庸無  
能者皆得之得者不之愧與者不之難也曰不應格矣雖真賢  
實能繁廉才智之士皆不得也不得者莫之怨不當者莫之恤  
也吏部者曰彼不愧不怨吾事畢矣如募役焉書其產之高下  
而甲乙之按其役之久近而勞逸之呼一吏而閱之簿盡矣此  
縣令所以止小民之爭也吏部注擬百官而寄之以天下之民

命乃亦止於止爭而已乎故曰亦不異於一吏今吏部亦有所謂銓量者矣揖之使書以觀其能書與否也召見面而視之以探其有疾與否也藉之使拜以試其視聽之明聞筋力之老壯也曰銓量者如是而已矣賢不肖愚智何與焉昔晉用山濤爲吏部尚書而中外品貳員多所啓授宋以蔡廓爲吏部尚書郎使入謂宰相徐羨之曰若得行吏部之職則拜不然則否羨之答曰黃散以下悉委廓猶以爲失職遂不拜蓋古之吏部雖黃門散騎皆由吏部之選授則當時之爲吏部者豈亦止取夫若今之所謂應格者而爲黃散耶抑將止取夫今之所謂銓量者而爲黃散耶臣願朝廷稍增重尚書之權使之得以察百官之能否而予奪之如丞簿以下官小而任輕者固未能人人而察之也至於縣宰之寄以百里之民者守貳之寄以一郡之民者豈不重哉且天下幾州一州幾縣一歲之中居者待者之外趨部而注擬縣宰者幾人守貳又幾人則亦不過三數百而已以一歲

三數百之守貳縣宰而散之於三百六十旬之日月則一日之注  
擬者絕多補寡亦無幾尔一日之間而不能察三數人之能否  
則其爲尚書者亦偶人而已日計之而不粗歲計之而精則其  
州縣之得人豈不十而五六哉雖不五六豈不十而三四哉以  
此校彼不猶愈乎或曰尚書權重則將得以行其私奈何是不  
然昔陸贄請令臺省長官各舉其屬而德宗疑諸司所舉皆有  
親故或受賂者贄諫之曰陛下擇相亦不出臺省長官之中豈  
有爲長官而不能舉一二屬吏居宰相則可擇千百官僚其要  
在於精擇長吏贄之說盡矣今朝廷百官孰非宰相進擬者而  
不疑也至於吏部尚書之注擬而獨疑其私乎精擇尚書而假  
之以予奪之權使得以精選守貳縣宰而無專拘之以文法庶  
乎天下不才之吏可以汰而天下之治可以後起也歟

刑濫

臣聞古之立法不惟懲天下之已犯亦以折天下之未犯蓋已

犯之必懲未犯之所以必折也是故懲之者法之義折之者法之仁義行故仁不窮仁行故義不數仁義相有而不相無此法之利也後之法非無仁義也利不見而害先焉者義數而仁窮而已義不可數數則民怨仁不可窮窮則民狎狎則犯者衆犯者衆則刑者數然則刑至於數者不生於刑之數而生於仁之窮民生於怨者不生於怨其刑而生於狎其法今夫民之情固喜溫而惡寒欲涼而惡熱也然冬不寒夏不熱則民病而死矣夫人知夫法之仁也不知夫狎之而死也是故愛極者恩之所從銷寬甚者猛之所自起古之聖人其法初不及後世之備也惟不使仁之窮而民之狎也是以立法而刑不試後之法蓋詳且密矣然文詳而舉之也略網密而漏之也疎天下之民窺其略也則知其詳必至於不舉責其疎也則知其密必至於甚漏知其不舉則犯之也易知其甚漏則犯之也頻刑安得不數民安得不怨哉嗟乎求用刑之疎者必至於用刑之數求天下之

警者必反以得天下之怨理固然也然則所謂舉之略而漏之  
疎者何也一曰法不執而多爲之岐二曰法徒設而自廢其禁  
罪莫大於殺人罪至於殺人何以議爲也則亦殺之而已漢高  
帝如此其寬仁也入關之初欲結天下之心如此其亟也欲除  
秦法之苛如此其銳也而其與民約法亦曰殺人者死帝不以  
爲疑民亦不以爲請何則上下皆使其當然也殺人而法不死  
孰不相殺以至於大亂哉此豈所謂當然而天下何便於此也  
故雖高帝欲取天下之速而不敢宥殺人之罪以詔天下之心  
歸秦民之苦於秦而不以高帝之不宥殺入爲帝之虐然則古  
之立法之意可知已矣而今之法不然殺人一也則有曰盜曰  
鬪之目焉則有曰故曰謀曰誤之別焉曰盜曰謀曰故者法之  
所必死也曰鬪則生死之間也曰誤則生矣果誤也亦殺人也  
又況所謂誤者未必誤而所謂謀與故者非謀非故也何則法  
不執則吏可賣吏可賣則民可遁有司取具獄而讀之曰此真

誤殺也不知夫吏之竊笑也此之謂法不執而多爲之岐夫民之所以畏法者何也非畏法也畏刑也法不用則爲法法用之則爲刑民不起則爲法民犯之則爲刑是以畏之也有法而不用不如无法何則无法則民未測其罪之所當有法而不用則民知其法之不足忌有法而民不忌是故布之號令不曰號令而曰空言垂之簡書不曰簡書而曰文具法至於爲空言文具是無法賢於有法也古之法始於必用而終於無所用今之法始乎不用而終乎不勝用夫法不求民之入而拒民之入者也古之法民不入也不招以入而民之入也不縱以出夫惟不出是以不入故始乎必用而終乎無所用今之法也有曰誣人以罪而不實者罪之以其罪自大辟以降皆是物也而用法者不然以一夫之片紙而興大獄鞠大罪也平之所謂大獄者初無獄之可興所謂大罪者亦無罪之可鞠上之人則俱釋之而已矣受誣者至於破家亡身而誣人者其獲不遺杖而遣則數民

何憚於不屢誡善良以求利也哉獄訟何時而可清也故始乎  
法不用而終乎法不勝用此之謂法徒設而自廢其禁蓋人有  
治於宅而防於盜者其始峻其牆而止出於一門又從而衛之  
以兵非以制其出者也以制其入者也夫是以盜不敢過未幾  
而慮夫樵牧者出入之逆也則鑿其東而門焉門多且徑而不  
能皆衛也則至於有門而不扃焉夫門多且徑則盜從其徑者  
入之矣有門不扃則群盜掉臂而入矣法不執而多爲之以孰  
不從其徑而入哉法徒設而自廢其禁孰不掉臂而入之哉臣  
願朝廷詳慮而審處之如殺人者不死此法可以更議而誣許  
者罪以其罪此法可以必行議其所當議而行其所不行則成  
康不試之事雖未易致也而漢文幾措之風其猶可及歟

### 冗官

臣聞聖人之爲天下必與天下難其初難其初猶病於未而况  
易其初者乎易其初則天下孰不曰聖人之於我易也則我之

求也何難於是貧求富賤求貴一獲者求与而聖人亦曰來吾  
富尔吾貴尔吾与尔天下皆欣然曰聖人之於我果易也則求  
者紛然以來來者不勝其衆則應者不勝其費使費而有以費  
也則与天下尽費而何惜然求者无窮与者有極与者既竭求  
者方來以有極塞无窮則上不堪其煩以方來責既竭則下不  
厭其既下不厭而上不堪則上之人閉戶以却其下其初惟恐  
天下之不來也而不慮其來而无以受惟恐天下之不悅也而  
不慮其悅而无以繼其始不慮其終无及於慮則安得而不閉  
戶也欲其閉之也孰若其初之不閉也開以召之獨得閉而却  
之哉舟人之操舟也有万斛之舟焉有一尊之舟焉以一尊之  
力載一尊則一尊小而大以万斛之力載万斛則万斛重而輕  
不善操舟者不計其舟之能而惟其人之悅百人而登一尊不  
知拒也百万之粟而委於万斛之舟不知辭也中流而不遇風  
可也中流而遇風何如哉則入浮於舟也天下非舟乎堯舜之



時民之善而可封者比屋焉士之可用願為臣者方邦黎獻焉  
為堯舜者將盡封而官之乎官不過百而國不過方則盡天下  
之地有不足封而盡朝廷之官有不足於仕者矣數以言以採  
諸其中明以功以試諸其外可者取否者黜天下之悅不悅堯  
舜不恤也則人不浮於舟也官何自而冗朝廷自天子龍雍之  
初固天下之大慶也固不可以无天下之大賚也然邊藩之州  
出節之鎮士之泛恩而官焉進士之年得官應而未合格者皆  
以橫恩而官焉官者以千計焉何其多也任子之法議臣請因  
多故而痛省之可省而不省也郊焉而任者又以數千計何其  
愈多也此而不惜至於吏部灑墨而不去官簿汗牛而日增之  
不加少而官不加多則減策職罷能寺薄於內而省監司之僚屬  
於外而官冗自若也不難其初而難其後其有及乎為今之計  
龍雍之恩无所於吝矣而任子猶可議否也任子之法借未能  
限其入官之門盡亦嚴其試吏之塗耶勿限其門名也嚴其塗

實也寬與嚴並名與實偕則有不省之省不減之減夫子之射也觀者如墻夫子不拒也至使子路出而令焉則去者半矣此之謂不拒之拒勿限其門如墻者也嚴其塗半去者也吾非去之也吾之法行而彼自去也仕進之塗之盛者進士任子而已士之萃於大學與於州縣三歲而一詣太常者亡慮數千而南宮之以名聞得官者儉於三百焉累不特恩而得官者儉於二百焉則是大批有再而進士之官有僅及於千也至於任子公卿侍從每郊而任焉庶官再郊而任焉校於進士則郊者再任子之官者五六十人也進士之脩身積學有老死而不第得之難如此而取之不勝其寡任子者至未勝衣而命焉得之易如此而取之不勝其多則冗官之源在進士乎在任子乎故臣以謂惜未能限其入蓋亦嚴其試何爲而取也任子之銓其歲視進士之大比而非大比則不銓取人之法其數視進士之多少而以初銓爲定額其場屋之日昔以五今以三則繁簡者

矣其中程之藝者以一今以三則易焉者難矣如是其中者乃得補州縣之吏而其五不中者然後特與之補吏焉自宰相子弟下至於庶官之子弟必均焉則一舉而三利得矣貴家子弟脫綺繡之習而勵寒素之業以成其才一也得之不輕則愛之也重孰不自奮於功名而國與民不受其厲二也進士任子其進也均則兩無怨其來也徐則應者不迫初難而末甚易不過十年官曹清矣三也又何官冗之足病也

### 民政

臣聞民者國之命而吏之仇也吏者君之喜而國之憂也天下之所以存亡國祚之所以短長出於此而已矣且吏何惡於民而仇之也非仇民也不仇民則大者無功而其次者有罪罪驅之於後功陷之於前雖欲不與民爲仇不可得也是故一政之出一上有意而未決則吏贊之上有命而未行則吏先之吏之所贊上之矣而先上之行者非贊其便民也贊其不便於民者

尔曷爲不贊其便民而贊其不便民者耶贊便民者無功而贊其不便於民者則有功也是故政之不便於民者未必皆上之過也朝廷額額外而取一金以問其主之守臣必曰可也民曰不可不以聞矣不惟不以聞也從而欺其上曰民皆樂輸又從而矜其功曰不擾而集上賦其民以一則吏因以賦其十上賦其民以十則吏因以賦其百朝廷審其辦而不知有破產鬻子之民賞其功而不知有欲食吏肉之民吏之肉不足食也功歸於臣怨歸於君利於國者小害於國者大此可悼也古之人君所以至於民散國亡而不悟者皆吏誤之也蓋賦重而民怨此英雄敵國之資也可不懼哉唐趙贊爲一切聚斂之策德宗盡用之及涇平之變都民散廷而賊大呼曰汝曹勿恐不奪汝商貨儻資矣不稅汝間架陌錢矣德宗亦聞此言乎奉天之圍危於一髮而猶庇趙贊若愛子然夫愛一趙贊而不愛社稷之重忍於圍逼之辱而不忍於誅一聚斂之臣其入獄之深如此至

於友國可以戒矣然趙光奇許之以和糴害民則不信蘇弁欺之以宮市利民則信焉且夫朝廷之政雖聖人豈能盡善惟其思以出之詢以審之見不可而更之斯聖人而已矣何德宗之難信也國家軍旅再動蓋有不得已而取之於民者然譬之張琴動則急之靜則緩之蓋動必有靜靜之則其動必調急必有緩緩之則其急不絕以動繼動以急增急則雖黃帝五十弦之瑟亦无全弦矣聞之道路往歲擄寇之作亦守臣和糴行之不善所致也嘗有以告陛下者乎天下皆知朝廷有意此等役矣雖然臣猶有聞焉江西之郡蓋有甲郡以絹非土產而言於朝乞市之於乙郡者此何謂也民所最病者與官爲市也始乎爲市終乎抑配是以聖人謹其始也今一郡之諸邑已有論稅之尚下而科之者矣無一錢償民也民之不願者官且治之名爲督責於正祖實爲鄰郡之橫斂且有所謂和買者已例爲正祖矣又有所謂准依者亦例爲正祖矣今又求鄰郡之絹則三者

之絹與正租之絹為四倍而取之矣民何以堪而吏不以聞惟朝廷亟羅之庶不為斯民不拔之疽根矣且無使民言曰此絹自陛下始若曰其如甲郡軍士之寒何然則前乎此者士皆冬而不裘耶且甲郡欲市一郡之絹何不遣吏私市之何必假朝命而官市之哉此必有其焉甲郡則出大慶之錢且書之曰某日出某錢以市某郡之絹也然某錢不及乙郡之民也此必有私之者矣民何從而許哉蓋民許於朝廷朝廷下之州縣州縣執許者皆之以誣其服又呼其民強使之書於紙曰官有錢償我矣州縣以許者之所服與民之所書而復於朝廷朝廷又無以誅也罰一懲百誰敢復言者民有飲恨而已矣晉女敬齊曰何必齊魯以肥祀聖天子在位而有司不平如此